

特 224

483

朱子語類日鈔



始



特 224
483



語類日鈔



朱子語類日鈔序

朱子之學衰絕近百年矣。澧早年涉獵世學，不知讀朱子書。中年以後始讀之，以語類繁博，擇其切要標識卷端，冀可尋其門徑。亡兒宗誼鈔爲一裘，是時方避夷亂，寓居橫沙，踰年宗誼死，乃檢取所鈔，增損排類，分爲五卷，嘗考四庫存目鈔朱子語者凡十餘家，提要皆頗貶抑，蓋道學風氣盛時，或依附以沽名，或爭辯以求勝，故無取焉。近時風氣不復，有此惟元和顧千里鈔語類爲一編，名曰遜翁，苦口然聞其名，未見其書，蓋成書而未刻，澧爲此編，初亦不欲示人。

也嗚呼兵燹流離之際獨以舉世所不談之學父子相與講誦於空江寂寞之濱其迂拙可哂矣其子又短命而死暮年屯蹇又可悲矣近年頗有著書然其成不成正不可知此編簡約今以付刻冀有因此而讀朱子之書為朱子之學者則吾將釋悲而為喜也咸豐十一年十月番禺陳澧謹序

朱子語類日鈔卷一

番禺陳澧編

鍾山別業叢書之□

為學之道聖賢教人說得甚分曉大抵學者讀書務要窮究道問學是大事要識得道理去做人

十卷

學者須是立志今人所以悠悠者只是把學問不曾做一件事看遇事則且胡亂恁地打過了此只是志不立

八卷

若曰我之志只是要做箇好人識些道理便休宜乎工夫不進日夕漸漸消磨今須思量天之所以與我者必須是光明正大必不應只如此而止就自家性

分上儘做得去不到聖賢地位不休如此立志自是歇不住自是儘有工夫可做卷一百一十八

如今學者誰不爲學只是不可謂之志於學如果能志於學則自住不得卷二一十三

夫一陰一陽相對志纔立則已在陽處立雖時失腳入陰然一覺悟則又在於陽卷一百一十八

只據而今當地頭立定腳做去補填前日欠闕栽種後來根株如二十歲覺悟便從二十歲立定腳力做去三十歲覺悟便從三十歲立定腳力做去縱待八九十歲覺悟也當據見定筭住硬寨做去卷七

大抵爲學須是自家發憤振作鼓勇做去直是要到一日須見一日之効一月須見一月之効諸公若要

做便從今日做去卷一百一十三

學者做工夫只今便要做去斷以不疑鬼神避之需者事之賊也卷八

如人喫飯是自家肚飢定是要喫又如人做家主要錢使在外面百方做計一錢也要將歸這是爲甚如此只爲自家身上事若如此爲學如何會無所得卷一百一十

凡人謂以多事廢讀書或曰氣質不如人者皆是不

責志而已若有志時那問他事多那問他氣質不美
曰事多質不美者此言雖若未是太過然即此可見
其無志甘於自暴自棄過孰大焉真箇做工夫人便
自不說此話卷一百十八

人多言為事所奪有妨講學此為不能使船嫌溪曲
者也遇富貴就富貴上做工夫遇貧賤就貧賤上做
工夫卷八

或言在家衮衮但不敢忘書冊亦覺未免閒斷曰只
是無志若說家事又如何汨沒得自家卷一百二十一
或以科舉作館廢學自咎者曰不然只是志不立不

曾做工夫爾卷十

有言貧困不得專意問學者曰不干事世間豈有無
事底人但十二時看那箇時閑一時閑便做一時工
夫一刻閑便做一刻工夫積累久自然別卷一百二十一
胡叔器患精神短曰若精神少也只是做去不成道
我精神少便不做卷一百二十

又有一般人說此事難理會只恁地做人自得讓與
他們自理會如人交易情願批退帳待別人典買今
人情願批退學問底多卷一百二十一
公等每日只是閑用心問閑事說閑話底時節多問

緊要事究竟自己底事時節少若是真箇做工夫底

人他自是無閑工夫說閑話問閑事卷一百二十一

聖賢說得極分明夫子說了孟子恐後世不識又說

向裏後之學者依舊不把做事更說甚閑話卷一百一十八

且人一日閒此心是起多少私意起多少計較都不

會略略回心轉意去看把聖賢思量不知是在天地

閒做甚麼也卷一百一十七

要須反己深自體察有箇火急痛切處方是入得門

戶若只如此悠悠定是閑過日月向後無得力處莫

相怪也卷一百一十八

若如諸公悠悠是要如何光陰易過一日減一日一

歲無一歲只見老大忽然死著思量來這是甚則劇

恁地悠悠過了卷一百二十一

或曰某人讀書只是摘奇巧為文章以求富貴耳曰

恁地工夫也只得那不好底文章定無氣魄所以

他文字皆困苦某小年見上一輩未說如何箇箇有

氣魄敢擔當做事而今人箇箇都恁地衰無氣魄也

是氣運使然而今秀才便有些氣魄少年被做那時

文都銷磨盡了所以都無精采做事不成卷一百三十二

或謂此等人亦緣科第高要做官職牽引得如此曰

只是自家無志若是有志底自然牽引他不得蓋他氣力大如大魚相似看是甚網都迸裂出去才被這些子引動便是元無氣力底人卷一百三十士人先要分別科舉與讀書兩件孰輕孰重若讀書上有七分志科舉上有三分猶自可若科舉七分讀書三分將來必被他勝卻況此志全是科舉所以到老全使不著卷十專一做舉業工夫不待不得後枉了氣力便使能竭力去做又得到狀元時亦自輸卻這邊工夫了卷十南安黃謙父命之入郡學習舉業而徑來見先生先

生曰既是父要公習舉業何不入郡學日則習舉業夜則看此書自不相妨卷十以舉業為妨實學不知曾妨飲食否只是無志也卷十

這下人全不讀書莫說道教他讀別書只是要緊如六經漢書唐書諸子也須著讀始得又不是大段值錢了不能得他讀只問人借將來讀也得如何一向只去讀時文如何擔當箇秀才名目在身已上既做秀才未說道要他理會甚麼高深道理也須知得古聖賢所以垂世立教之意是如何古今盛衰存亡治

亂事體是如何從古來人物議論是如何這許多眼前底都全不識如何做士人

卷一百二十一

朱子語類日鈔卷一

朱子語類日鈔卷二

番禺陳澧編

天下無書不是合讀底無事不是合做底若一箇書不讀這裏便缺此一書之理一件事不做這裏便缺此一事之理

卷一百一十七

今人只辦得十日讀書下著頭不與閑事管取便別莫說十日只讀得一日便有功驗人若辦得十來年讀書世閒甚書讀不了

卷十

讀其他書不如讀論語最要蓋其中無所不有

卷一百二

如論語所載皆是事親取友居鄉黨目下使用得者所言皆對著學者即今實事卷一百一十七

今讀論語且熟讀學而一篇若明得一篇其餘自然

易曉卷二一十

若每章翻來覆去看得分明若看十章敢道便有長

進卷二一十一

初學固是要看大學論孟若讀得大學一書透徹其

他書都不費力觸處便見喟然歎者久之曰自有這

箇道理說與人不信卷十九

倪曰自幼既失小學之序願授大學曰授大學甚好

也須把小學書看只消旬日工夫卷一百一十八游倪

孟子之書明白親切無甚可疑者只要日日熟讀須

教他在吾肚中先千百轉便自然純熟卷十九

問所觀書璘以讀告子篇對曰古人興於詩詩可以

興又曰雖無文王猶興人須要奮發興起必為之心

為學方有端緒古人以詩吟詠起發善心今既不能

曉古詩某以為告子篇諸段讀之可以興發人善心

者故勸人讀之卷一百一十八滕璘

看文字且先看明白易曉者此語是某發出來諸公

可記取卷八十三

讀書之法須是用工去看先一書費許多工夫後則無許多矣始初一書費十分工夫後一書費八九分後則費六七分又後則費四五分矣卷十

讀書須立下硬寨定要通得這一書方看第二書若此書既曉未得我甯死也不看那箇如此立志方成

工夫卷一百十六

人做工課若不專一東看西看則此心先已散漫了如何看得道理出須是看論語專只看論語看孟子專只看孟子讀這一章更不看後章讀這一句更不得看後句這一字理會未得更不得看下字如此則

專一而功可成若所看不一汎濫無統雖卒歲窮年無有透徹之期某舊時看文字只是守此拙法以至於今思之只有此法更無他法卷十一

這箇貪多不得讀得這一篇恨不得常熟讀此篇如無那第二篇方好而今只是貪多讀第一篇了便要讀第二篇讀第二篇了便要讀第三篇恁地不成讀書此便是大不敬此句屬聲說須是殺了那走作底心方可

讀書卷八

問林恭甫看論語至何處曰至述而曰莫要恁地快這箇使急不得須是緩緩理會須是逐一章去搜索

候這一章透徹後卻理會第二章久後通貫卻事事會看如喫飯樣喫了一口又喫一口喫得滋味後方

解生精血若只恁地吞下去則不濟事卷十

問論語近讀得如何昨日所讀底今日再讀見得如何榦曰尙看未熟曰這也使急不得也不可慢所謂急不得者功效不可急所謂不可慢者工夫不可慢

卷十九
黃榦

大凡看文字少看熟讀一也不要鑽研立說但要反覆體驗二也埋頭理會不要求效三也三者學者當守此卷十

讀書不可貪多常使自家力量有餘今學者不付自己力量去觀書恐自家照管他不過卷十

又問讀書宜以何爲法曰須少看卷一百一十八

讀書小作課程大施功力如會讀得二百字只讀得一百字卻於百字中猛施工夫理會子細讀誦教熟如此不會記性人自記得無識性人亦理會得若泛泛然貪多只是無益耳卷十

書只貴讀讀多自然曉今卽思量得寫在紙上底也不濟事終非我有只貴乎讀這箇不知如何自然心與氣合舒暢發越自見記得牢縱饒熟看過心裏思

量過也不如讀讀來讀去少閒曉不得底自然曉得已曉得者越有滋味若是讀不熟都沒這般滋味而今未說讀得注且只熟讀正經行住坐臥心常在此自然曉得嘗思之讀便是學夫子說學而不思則罔思而不學則殆學便是讀讀了又思思了又讀自然有意十卷

書也只是熟讀常記在心頭便得雖孔子教人也只是學而時習之若不去時習則人都不奈你何只是孔門弟子編集把這箇作第一件若能時習將次自曉得十分難曉底也解曉得十卷二

一學者患記文字不起先生曰只是不熟不曾玩味入心但守得册子上言語所以見册子時記得纔放下便忘了若使自家實得他那意思如何會忘卷一百二

讀書如煉丹初時烈火鍛煞然後漸漸慢火養又如煮物初時烈火煮了卻須慢火養讀書初勤敏著力子細窮究後來卻須緩緩溫尋反復玩味道理自出又不得貪多欲速直須要熟工夫自熟中出卷一百十四看此一章便須反覆讀誦逐句逐節互相發明如此三二十過而曰不曉其義者吾不信也卷五十二

讀書須讀到不忍捨處方是見得真味若讀之數過略曉其義即厭之欲別求書看則是於此一卷書猶

未得趣也

卷一百四

書讀到無可看處恰好看

卷一百十六

既識得了須更讀百十遍使與自家相乳入便說得

也響

卷十

讀書切不可自謂理會得了便理會得且只做理會不得某見說不會底便有長進不長進者多是自謂

已理會得了底

卷一百二十

大抵為學雖有聰明之資必須做遲鈍工夫始得既

是遲鈍之資卻做聰明底樣工夫如何得

卷八

某如今看來惟是聰明底人難讀書難理會道理蓋

緣他先自有許多一副當聖賢意思自是難入

卷一百三

九十

今學者看文字不必自立說只記得前賢與諸家說

便得而今看自家如何說終是不如前賢

卷一百二十一

某嘗說文字不難看只是讀者心自曉崎了看不出

若大著意思反復熟看那正當道理自湧出來不要

將那小意智私見識去閒亂他如此無緣看得出

卷一

百二十一

大凡看書須只就他本文看教直截切忌如此支離
 蔓衍拖腳拖尾不濟得事聖賢說話那一句不直截
 如利刃削成相似雖以孔子之語渾然溫厚然他那
 句語更是斬截若如公說一句更用數十字去包他
 則聖賢何不逐句上更添幾字教他分曉卷一百二十一
 林士謙初見問仁智自得處曰仁者得其為仁智者
 得其為智豈仁智之外更有自得公此問不成問且
 去將論語從學而時習讀起孟子將梁惠王讀起大
 學從大學之道在明明德讀起中庸從天命之謂性
 讀起某之法是如此不可只摘中間一兩句來理會

意脈不相貫卷一百二十一

某自潭州來其他盡不曾說得只不住地說得一箇

教人子細讀書卷十

所謂涵泳者只是子細讀書之異名也卷一百一十六

先生問時舉觀書如何時舉自言常苦於粗率無精
 密之功不知病根何在曰不要討甚病根但知道粗
 率便是病在這上便更加仔細便了今學者亦多來
 求病根某向他說頭痛灸頭腳痛灸腳病在這上只
 治這上便了更別討甚病根也卷一百一十四 潘時舉
 為學讀書須是耐煩細意去理會切不可麤心若曰

何必讀書自有箇捷徑法便是誤人底深坑也未見道理時恰如數重物色包裹在裏許無緣可以便見得須是今日去了一重又見得一重明日又去了一重又見得一重去盡皮方見肉去盡肉方見骨去盡骨方見髓使麤心大氣不得十卷曉得文義是一重識得意思好處是一重若只是曉得外面一重不識得他好底意思此是一件大病一卷

四百十
 或人請諸經之疑先生既答之復曰今雖盡與人說公盡曉得不於自家心地上做工夫亦不濟事百一卷二

一十
 須要思量聖人之言是說箇甚麼要將何用若只讀過便休何必讀一卷十

如今讀書須是加沈潛之功將義理去澆灌胸腹漸漸盪滌去那許多淺近鄙陋之見方會見識高明一卷

四百
 讀書不可只專就紙上求義理須反來就自家身上以手推究一卷十

或問讀書工夫曰這事如今似難說如世上一等人說道不須就書册上理會此固是不得然一向只就

書冊上理會不曾體認著自家身己也不濟事如說
仁義禮智曾認得自家如何是仁自家如何是義如
何是禮如何是智須是著身己體認得如讀學而時
習之自家曾如何學自家曾如何習不亦說乎曾見
得如何是說須恁地認始得若只逐段解過去解得
了便休也不濟事卷十一

默而識之學不厭教不倦今學者須是將此三句時
時省察我還能默識否我學還不厭否我教還不倦
否如此乃好卷三十四

大凡讀書須是要自家日用躬行處著力方可且如

居處恭執事敬與人忠雖之夷狄不可棄也與那言
忠信行篤敬雖蠻貊之邦行矣言不忠信行不篤敬
雖州里行乎哉此二事須是日日粘放心頭不可有
些虧欠處此最是爲人日下急切處切宜體之卷四十三
世俗之學所以與聖賢不同者亦不難見聖賢直是
真箇去做說正心直要心正說誠意直要意誠修身
齊家皆非空言今之學者說正心但將正心吟詠一
餉說誠意又將誠意吟詠一餉說修身又將聖賢許
多說修身處諷誦而已或掇拾言語綴緝時文如此
爲學卻於自家身上有何交涉卷八

見說毋不敬便定定著毋不敬始得見說思無邪便定定著思無邪始得書上說毋不敬自家口讀毋不敬身心自恁地怠慢放肆詩上說思無邪自家口讀思無邪心裏卻胡思亂想這不是讀書卷一百一十四程子言有讀了後全然無事者有得一二句喜者到這一二句喜處便是入頭處如此讀將去將久自解踏著他關捩了倏然悟時聖賢格言自是句句好須知道那一句有契於心著實理會得那一句透如此推來推去方解有得卷八十一大凡爲學最切要處在吾心身其次便是做事此是

的實緊切處又那裏見得如此須是聖人之言今之學者須是把聖人之言來窮究見得身心要如此做事要如此天下自有一箇道理若大路然聖人之言便是那引路底卷一百一十二

讀書便是做事凡做事有是有非有得有失善處事者不過稱量其輕重耳讀書而講究其義理判別其是非臨事卽此理卷十一

看來如今學者之病多是箇好名且如讀書卻不去子細考究義理教極分明只是纔看過便了只道自家已看得甚麼文字了都不思量於身上濟得甚事

這箇只是做名聲其實又做得甚麼名聲下梢只得人說他已看得甚文字了若恁地也是枉了一生一卷

百二十一

江文卿博識羣書因感先生之教自咎云某五十年前枉費許多工夫記許多文字曰也不妨如今若理會得這要緊處那許多都有用如七年十載積疊得柴了如今方點火燒卷一百二十

朱子語類日鈔卷二

朱子語類日鈔卷三

番禺陳澧編

入道之門是將自家身已入那道理中去漸漸相親久之與己爲一而今人道理在這裏自家身在外面全不曾相干涉卷一百二十一

今只是要理會道理若理會得一分便有一分受用理會得二分便有二分受用理會得一寸便是一寸一尺便是一尺漸漸理會便多卷九
只是眼前切近起居飲食君臣父子兄弟夫婦朋友處便是這道理只就近處行到熟處見得自高卷十八

看道理須要就那大處看便前面開闊不要就壁角裏地步窄一步便觸無處去了而今且要看天理人欲義利公私分別得明將自家日用底與他勘驗須漸漸有見處前頭漸漸開闊那箇大壇場不去上面做不去上面行只管在壁角裏縱理會得一句只是一句透道理小了卷一百一十七

若真箇看得這一件道理透入得這箇門路以之推他道理也只一般只是公等不曾通得這箇門路每日只是在門外走所以都無入頭處都不濟事卷一百一十七

若恁地看文字終不見得道理終不濟事徒然費了時光須是勇猛向前匹馬單鎗做將去看如何只管

怕箇甚麼卷一百一十八

某與人說學問止是說得大槩要人自去下工譬如寶藏一般其中至寶之物何所不有某止能指與人說此處有寶若不下工夫自去討終是不濟事卷一百一十八

六
講論自是講論須是將來自體驗說一段過又一段何補某向來從師一日說話晚頭如溫書一般須子細看過有疑則明日又問又曰體驗是自心裏暗自

講量一次卷一百一十九

問前日承教令於日用閒體認仁義禮知意思且如朋友皆異鄉人一日會聚思意便自相親這可見得愛之理形見處同門中或有做不好底事或有不好底人便使人惡之這可見得羞惡之理形見處每時升堂尊卑序齒秩然有序而不亂這可見得恭敬之理形見處聽先生教誨而能辨別得真是真非這可見得是非之理形見處凡此四端時時體認不使少有閒斷便是所謂擴充之意否曰如此看得好這便是尋得路踏著了卷五十三

要知天之與我者只如孟子說無惻隱之心非人也無羞惡之心非人也無是非之心非人也無辭遜之心非人也今人非無惻隱羞惡是非辭遜發見處只是不省察了若於日用閒試省察此四端者分明迸贊出來就此便操存涵養將去便是下手處卷一百一十八

痛理會一番如血戰相似然後涵養將去未能識得涵養箇甚卷九

今日用功且當以格物爲事不曰窮理卻說格物者要得就事物上看教道理分明見得是處便斷然行將去不要遲疑將此逐日做一段工夫勿令作輟夫

是之謂集義

卷一百十三

某數日來因思聖人所以說箇格物字工夫盡在這

裏今人卻是無這工夫所以見識皆低

卷一百三十

格物須真見得決定是如此爲子豈不知是要孝爲

臣豈不知是要忠人皆知得是如此然須當真見得

子決定是合當孝臣決定是合當忠決定如此做始

得

卷十五

問格物工夫未到得貫通亦未害否曰這是甚說話
而今學者所以學便須是到聖賢地位不到不肯休
方是但用工做向前去但見前路茫茫地白莫問程

途少閒自能到如何先立一箇不解做得便休底規
模放這裏了如何做事且下手要做十分到了只做
得五六分下手做五六分到了只做得三四分下手
做三四分便無了

卷十五

豈有學聖人之書爲市井之行這箇窮得箇甚道理
而今說格物窮理須是見得箇道理親切了未解便
能脫然去其舊習其始且見得箇道理如此那事不
是亦不敢爲其次見得分曉則不肯爲又其次見得
親切則不爲之而舊習都忘之矣

卷十五

如今且要分別是非是底直是非底直是非少閒

做出便會是若依稀底也喚作是便了。下梢只是非須是要做第一等人。若決是要做第一等人。若才力不逮也。只做得第四五等人。今合下便要。做第四五等人。說道就他才地如此。下梢成甚麼物事。卷八十四某嘗謂凡事都分做兩邊。是底放一邊。非底放一邊。是底是天理。非底是人欲。是即守而勿失。非即去而勿留。此治一身之法也。治一家則分別一家之是非。治一邑則分別一邑之邪正。推而一州一路以至天下。莫不皆然。此直上直下之道。卷一百三十二看來別無道理。只有箇是非。若不理會得是非分明。

便不成人。若見得是非。方做得人。這箇是處。便是人立腳底地盤。向前去。雖然更有裏面子細處。要知大源頭。只在這裏。且要理會這箇教明白。始得這箇是處。便即是道。便是所謂天命之謂性。率性之謂道。萬物萬事之所以流行。只是這箇做得是便。合道理纔不是便。不合道理。所謂學問也。只在這裏。所以大學要先格物致知。一件物事。固當十分好。若有七分好。二分不好。也要分明。這箇道理。直是要分明細入於毫髮。更無些子夾雜。卷一百三十一所謂道。不須別去尋討。只是這箇道理。非是別有一

箇道被我忽然看見攫拏得來方是見道只是如日用底道理恁地是恁地不是事事理會得箇是處便是道也

卷十

天下事須論一箇是不是後卻又論其中節與不中

節

卷一百三十二

如初閒看善惡如隔一牆只管看來漸漸見得善惡如隔一壁看得隔一壁底已自勝似初看隔一牆底了然更看得又如隔一幅紙這善惡只是爭些子這裏看得直是透善底端的是善惡底端的是惡略無些小疑似大學只要論箇知與不知知得切與不切

卷一百七

道理要見得真須是表裏首末極其透徹無有不盡真見得是如此決然不可移易始得不可只窺見一

班半點便以爲是

卷一百十七

因建陽士人來請問先生曰公們如此做工夫大故費日子覺得今年只似去年前日只是今日都無昌大發越底意思這物事須教看得精透後一日千里始得而今都泛泛在那皮毛上理會都不曾抓著那痒處濟得甚事

卷一百二十一

讀書看義理須是開豁胸次令磊落明快恁地憂愁

作甚底亦不可先責効才責効便見有憂愁底意思
 只管如此胸中結聚一餅子不散須是胸中寬閑始
 得而今且放置閑事不要閑思量只專心去玩味義
 理便會心精心精便會熟卷一百一十五
 若不見得入頭處緊也不可慢也不得若識得些路
 頭須是莫斷了若斷了便不成待得再新整頓起來
 費多少力如雞抱卵看來抱有甚煖氣只被他常常
 恁地抱得成若把湯去盪便死了若抱才住便冷了
 然而實是見得入頭處也自不解住了自要做去他
 自得些滋味了如喫果子相似未識滋味時喫也得

不消喫也得到識滋味了要住自住不得卷八

昌父言學者工夫多閒斷曰聖賢教人只是要救一

箇閒斷卷一百二十一 昌父趙蕃字

問學如登塔逐一層登將去上面一層雖不問人亦
 自見得若不去實踏過卻懸空妄想便和最下底一
 層不曾理會得卷十

爲學正如推車子相似才用力推得動了便自轉將
 去更不費力故論語首章只說箇學而時習之不亦
 悅乎便言其効驗者蓋學至說處則自不容已矣卷三

一十

這一邊道理熟那一邊俗見之類自破卷十

纔明理後氣質自然變化病痛都自不見了卷一百一十八

若理會得透徹到臨事時一一有用處而今人多是

閑時不喫緊理會及到臨事時又不肯下心推究道

理只說且放過一次亦不妨只是安于淺陋所以不

能長進終於無成卷十

今人未有所見時直情做去都不見得一有所見始

覺所為多有寒心處卷十

今世文人才士開口便說國家利害把筆便述時政

得失終濟得甚事只是講明義理以淑人心使世間

識義理之人多則何患政治之不舉耶卷十

朱子語類日鈔卷三

朱子語類日鈔卷四

番禺陳澧編

所謂存心者或讀書以求義理或分別是非以求至當之歸只那所求之心便是已存之心何俟塊然以處而後為存耶

卷一百一十五

人常讀書庶幾可以管攝此心使之常存橫渠有言書所以維持此心一時放下則一時德性有懈其何可廢

卷十一

問節昔以觀書為致知之方今又見得是養心之法曰一舉兩得這邊又存得心這邊理又到節復問心

在文字則非僻之心自入不得先生應卷一百十五甘節
 把捉之說固是自用著力然又以枯槁無滋味卒急
 不易著力須平日多讀書講明道理以涵養灌培使
 此心常與理相入久後自熟方見得力處卷一百十八
 大凡人心若勤緊收拾莫令放寬縱逐物安有不得
 其正者若真箇提得緊雖半月見驗可也卷一百十三
 固不免有散緩時但才覺便收斂將來漸漸做去但
 得收斂時節多散緩之時少便是長進處卷一百十三
 今且要收斂此心常提撕省察且如坐閒說時事逐
 人說幾件若只管說有甚是處便截斷了提撕此心

令在此卷一百十三

人若於日閒閑言語省得一兩句閑人客省見得一
 兩人也濟事若渾身都在鬧場中如何讀得書卷一百一十六

或說事多曰世事無時是了且揀大段無甚緊要底
 事不要做又逐旋就小者又揀出無緊要底不要做
卷十三

大凡一等事固不可避避事不是工夫又有一等人
 情底事得遣退時且遣退無時是了不要搜攬凡可
 以省得底事省亦不妨應接亦只是不奈何有合當

住不得底事此卻要思量處置裏面都是有箇理一卷

百十八

今雖說主靜然亦非棄事物以求靜既爲人自然用事君親交朋友撫妻子御僮僕不成捐棄了只閉門靜坐事物之來且曰候我存養又不可只茫茫隨他事物中走二者須有箇思量倒斷始得卷十

如何去討靜得有事時須著應且如早閒起來有許多事不成說事多撓亂人我且去靜坐不是如此無事時固是敬有事時敬便在事上且如早閒人客來相見自家須著接他接他時敬便在交接處少閒又

有人客來自家又用接他若自朝至暮人客來不已自家須盡著接他不成不接他無此理接他時敬便隨著在這裏人客去後敬亦是如此若厭人客多了心煩此卻是自撓亂其心非所謂敬也所以程子說學問到專一時方好蓋專一則有事無事皆是如此

卷一百十八

當靜坐涵養時正要體察思繹道理只此便是涵養不是說喚醒提撕將道理去卻那邪思妄念只自家思量道理時自然邪念不作卷十

何以窒慾伊川曰思此莫是言慾心一萌當思禮義

以勝之否曰然又問思與敬如何曰人於敬上未有用力處且自思入庶幾有箇巴攬處思之一字於學者最有力

卷九十七

或問人之思慮有邪有正若是大段邪僻之思卻容易制惟是許多無頭面不緊要之思慮不知何以制之曰此亦無他只是覺得不當思慮底便莫要思便從腳下做將去久久純熟自然無此等思慮矣

卷一百一十三

楊子順問涵養須用敬涵養甚難心中一起一滅如何得主一日人心如何教他不思如周公思兼三王

以施四事豈是無思但不出於私則可曰某多被思慮紛擾思這一事又牽走那事去雖知得亦自難止曰既知得不是便當絕斷了

卷九十五

問何謂主一日無適之謂一只是不走作又問思其所當思如何曰卻不妨但不可胡思且只得思一件事如思此一事又別思一件事便不可

卷九十六

問主一日做這一事且做這一事做了這一事卻做那一事今人做這一事未了又要做那一事心下千頭萬緒

卷九十六

或云主一之謂敬敬莫只是主一日主一又是敬字

注解要之事無小無大常令自家精神思慮盡在此
遇事時如此無事時也如此卷十

敬字不可只把做一箇敬字說過須於日用閒體認

是如何此心常卓然公正無有私意便是敬有些子

計較有些子放慢意思便是不敬故曰敬以直內要

得無些子偏邪卷四十四

敬卻不是將來做一箇事今人多先安一箇敬字在

這裏如何做得敬只是提起這心莫教放散恁地則

心便自明這裏便窮理格物見得當如此便是不當

如此便不是既是了便行將去卷一百一十五

敬非別是一事常喚醒此心便是人每日只鶻鶻突

突過了心都不曾收拾得在裏面卷六

或問主敬只存之於心少寬四體亦無害否曰心無

不敬則四體自然收斂不待十分著意安排而四體

自然舒適著意安排則難久而生病矣卷十二

今之言敬者乃皆裝點外事不知直截於心上求功

遂覺累墜不快活不若眼下於求放心處有功則尤

省力也但此事甚易只如此提醒莫令昏昧一二日

便可見効且易而省力只在念不念之間耳何難而

不為卷十

敬有死敬有活敬若只守著主一之敬遇事不濟之
以義辨其是非則不活卷十
敬不是閉眼默坐便爲敬須是隨事致敬要有行程
去處如今且未論齊家治國平天下只截自格物致
知誠意正心修身爲說此行程也方其當格物時便
敬以格之當誠意時便敬以誠之以至正心修身以
後節節常要惺覺執持令此心常在方是能敬卷十
今之言持敬者只是說敬非是持敬卷十
如說持敬便須入隻腳在裏面做不可只作說話看
了卷一百
二十

或問持敬患不能久當如何下工夫曰某舊時亦曾
如此思量要得一箇直截道理元來都無他法只是
習得熟熟則自久卷十
初學於敬不能無閒斷只是才覺閒斷便提起此心
只是覺處便是接續某要得人只就讀書上體認義
理日間常讀書則此心不走作或只去事物中察則
此心易得汨沒知得如此便就讀書上體認義理便
可喚轉來卷十
只要常提醒此心心才在這裏外面許多病痛自然
不見卷一百
十四

此心自不用大段拘束他他既在這裏又要向那裏討他要知只是爭箇醒與睡著耳人若醒時耳目聰明應事接物便自然無差錯處若被私欲引去便一似睡著相似只更與他喚醒才醒又便無事矣

卷一百一

四

學者常用提省此心使如日之升則羣邪自息他本自光明廣大自家只著些子力去提省照管他便了不要苦著力著力則反不是

卷二十二

前日侍坐深有得於先生醒之一字曰若長醒在這裏更須看惻隱羞惡是非恭敬之心所發處始得當

一念慮之發不知是屬惻隱耶羞惡是非恭敬耶須是見得分明方有受用處

卷五十九

便是物欲昏蔽之極也無時不醒覺只是醒覺了自放過去不曾存得耳

卷十七

人昏時便是不明纔知那昏時便是明也

卷二十二

纔思要得善便是善

卷十七

朱子語類日鈔卷四

此處是說天理人欲之辨。天理是公，人欲是私。公則明，私則暗。明則進，暗則退。此是說天理人欲之辨。天理是公，人欲是私。公則明，私則暗。明則進，暗則退。

朱子語類日鈔卷五

番禹陳澧編

人只有箇天理人欲此勝則彼退彼勝則此退無中立不進退之理凡人不進便退也譬如劉項相拒於滎陽成皋閒彼進得一步則此退一步此進一步則彼退一步初學則要牢筭定腳與他推推得一毫去則逐旋推將去此心莫退終須有勝時勝時甚氣象

卷十

問每常遇事時也分明知得理之是非這是天理那是人欲然到做處又卻爲人欲引去及至做了又卻

悔此是如何曰此便是無克己工夫這樣處極要與他掃除打疊如一條大路又有一條小路自家也知得合行大路然被小路有箇物事引著不知不覺走從小路去及至前面荆棘蕪穢又卻生悔此便是天理人欲交戰之機須是遇事時便與克下不得苟且放過

卷一百一十九

當良心與私欲交戰時須是在我大段著力與他戰不可輸與他只是殺賊一般一次殺不退只管殺殺數次時須被殺退了私欲一次勝他不得但教真箇知得他不好了立定腳根只管硬地自行從好路去

待得熟時私意自住不得因舉濂溪說果而確無難焉須是果敢勝得私欲方確然守得這道理不遷變問有何道理可助這箇果曰別無道理助得只是自著力戰退他

卷二十四

問去私欲氣稟之累曰只得逐旋戰退去若要合下便做一次排遣無此理亦不濟得事須是當事時子細思量認得道理分明自然勝得他次第這邊分明了那邊自然容著他不得如今只窮理爲上又問客氣暴怒害事爲多不知是物欲耶氣稟耶曰氣稟物欲亦自相連著且如人稟得性急於事上所欲必急

舉此一端可以類推又曰氣稟物欲生來便有要無不得只逐旋自去理會消磨大要只是觀得理分明便勝得他

卷十八

問天理真箇難明己私真箇難克望有以教之先生罵曰公不去用力只管說道是難孟子曰道若大路然豈難知哉人病不求耳往往公亦知得這箇道理好纔下手見未有入頭處便說道是難而不肯用力所以空過了許多月日可惜可惜公若用力久亦自有箇入頭處何患其難

卷一百一十九

蓋天理在人亙萬古而不泯恁甚如何蔽鋼而天理

常自若無時不自私意中發出但人不自覺正如明珠大貝混雜沙礫中零零星星逐時出來但只於這箇道理發見處當下認取簇合零星漸成片段到得自家好底意思日長月益則天理自然純固向之所謂私欲者自然消磨退散久之不復萌動矣若專務克治私欲而不能充長善端則吾心所謂私欲者日相鬪敵縱一時按伏得下又當復作矣

卷一百一十七

只才整頓起處便是天理無別天理但常常整起思

慮自一

卷一百一十二

誤了一事必須知悔只這知悔處便是天理

卷一百一十七

人自心若一毫私意未盡皆足以敗事如上有一點黑下便有一撲黑上有一毫差下便有尋丈差今若見得十分透徹待下梢遇事轉移也只做得五六分若今便只就第四五著理會下梢如何卷十三問私意竊發隨即鉏治雖去枝葉本根更在感物又發如何曰只得如此所以曾子戰戰兢兢如臨深淵如履薄冰卷一百十四或問顏子克己復禮曰公且未要理會顏子如何克己復禮且要理會自家身己如何須著克己復禮這也有時須曾思量到這裏顏子如何苦死要克己復

禮自家如何不要克己復禮如今說時也自說得儘通只是不曾關自家事也有被別人只管說說來說去無奈何去克己少閒又忘了這裏須思量顏子如何心肯意肯要克己復禮自家因何不心肯意肯去克己復禮這處須有病根先要理會這路頭方好理會所以克之之方須是識得這病處須是見得些小功名利達真箇是輕克己復禮事真箇是重真箇是不恁地不得卷四十一今人只爭箇勿字常記胡侍郎云我與顏子只爭一箇勿字顏子非禮便勿視我非禮亦視所以不及顏

子卷四十一

自欺是箇半知半不知底人知道善我所當為卻又不十分去為善知道惡不可作卻又是自家所愛舍他不得這便是自欺卷十

而今說自欺未說到與人說時方謂之自欺只是自家知得善好要為善然心中卻覺得微有些沒緊要底意思便是自欺便是虛偽不實矣卷十

只爭箇知與不知爭箇知得切與不切且如人要做好事到得見不好事也似乎可做方要做好事又似乎有箇做不好事底心從後面牽轉去這只是知不

切卷九

大凡意不誠分明是吾之賊我要上他牽下來我要前他拖教去後此最學者所宜察卷六十九

人有一正念自是分曉又從旁別生一小念漸漸放闊去不可不察卷一百四

先之問心有所好樂則不得其正曰心在這一事不可又夾帶那一事若自家喜這一項事了更有一事來便須放了前一項只平心就後一項理會不可又夾帶前喜之之心在這裏有件喜事不可因怒心來忘了所當喜處有件怒事不可因喜事來便忘了怒

且如人合當大門出卻又有些回避底心夾帶在裏面卻要行便門出雖然行向大門出念念只有箇行便門底心在這裏少刻或自拗向便門去學者到這裏須是便打殺那要向便門底心心如何不會端正

卷十六 先之黃卓字

欲知知之真不真意之誠不誠只看做不做如何真

箇如此做底便是知至意誠卷十 五

如今要緊只是將口讀底便做身行底說出底便是

心存底卷一百 十四

而今學者閑時都會說道理當如何只是臨事時依

前只是他那本來底面目出來都不如那閑時所說者卷九 十三

大抵事只有一箇是非是非既定卻揀一箇是處行將去必欲回互得人人道好豈有此理然事之是非久卻自定時下須是在我者無嫌仰不愧俯不作別人道好道惡管他卷一百 十三

某之講學所以異於科舉之文正是要切己行之若只恁地說過依舊不濟事若實是把做工夫只是敬以直內義以方外八箇字一生用之不窮卷六 十九因言孟子於義利閒辯得毫釐不差見一事來便劈

做兩片便分箇是與不是這便是集義處義是一柄

刀相似才見事到面前便與他割制了卷五十六

義如利刀相似胸中許多勞勞攘攘到此一齊割斷

了卷十六須於日用閒令所謂義了然明白卷十三

學者做切己工夫要得不差先須辨義利所在如思

一事非特財利利欲只每處求自家安利處便是推

些便不可入堯舜之道切須勤勤提省察之於纖微

毫忽之間不得放過如此不會錯用工夫卷一百十三

器之間義利之分臨事如何辨曰此須是工夫到義

理精方曉然未能至此且據眼前占取義一邊放令

分數多占得過這下來縱錯亦少卷十三之陳植字器

學者不於富貴貧賤上立定則是入門便差了也卷十三

學者當常以志士不忘在溝壑為念則道義重而計

較死生之心輕矣況衣食至微末事不得未必死亦

何用犯義犯分役心役志營營以求之耶某觀今人

因不能咬菜根而至於違其本心者衆矣可不戒哉

卷十三

卷十三

朱子語類日鈔卷五

省城西湖街
富文齋承刊

昭和十六年一月十五日 印刷
昭和十六年一月二十日 發行

定價金五拾錢

編輯者兼
發行者

東京市本郷區本郷二丁目二番地

田中慶太郎

印刷者

東京市神田區神保町三丁目十番地

春山治部左衛門

印刷所

東京市神田區神保町三丁目十番地

共立社印刷所

(號6列B格規)

發行所

東京市本郷區本郷二丁目二番地

文求堂

振替口座東京二一八番

414
238

終

